



25. september 2019

UKA 2019/90

Inatsisartut suleriesianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Alcoa-p nunatsinni aluminiuliorfissatut pilersitsinissaata ajalusoornrata kingorna qanoq Tasersiap nukissiuuteqarfissatut suli annertuumik periarfissaqarluartup, aningaasaleerusussinnaasunut soqutiginarortaqaarnersoq, qanorlu atorluarneqarneqarsinnaanera pillugu Inatsisartuni apeqquteqaat aallaavigalugu oqallisissiaq.**

(Inatsisartunut ilaasortaq Siverth K. Heilmann, Atassut)

Uteqqittariaqarpara. Taamanikkut politikikkut aalajangernialuusaarneq pillugu una suliaq annertooq nunatta aningaasaqarneranut suliffissaqartitsinikkullu annertuumik iluaqutaasussaagaluartoq uniinnarpoq. Tassungalu aalajangernialuusaarnermut peqquataaqataavoq storskala pillugu inatsisissaq suliarineqarmat, kiisalu aluminiup akiata appariartornerani suliffeqarfissuup unitsitsigallarneranut tunngavileeqataalluni. Uggornarpoq, takorluuinnaarlugu ullumikkut sumut killissimassagaluarnersugut iluatsissimasuuppat.

Aatsitsiviliornissamut Alcoa-miit ersarissumik ukiuni kingullerni paasisaqarsimanngeriatta, naggamik tunniutiinnarnanga maani qaqilertoqqippara ugguarluta issiaannarsinnaannginnatta. Suliallu annertooujussuup killiffianiit ingerlariaqqissinnaaniassagatta. Aatsitsiviliornissaq unitsivinneqassappat eqqaaneqarsinnaapput Norsk Hydro suliamik ingerlatitseqqiinnissamut soqutiginninersut paasissallugu.

Aatsitsiviliornissamut qitiulluinnarnikuvoq Tasersiaq, 2.500 Gwa tikillugu annertutigisumik erngup nukinganik pilersitsisinnaassusilik. Assersuutigisinnaavarpummi Utoqqarmiut Kangerluarsunnguani 0,044 Gwa-mik innaallagissamik pilersitsisartoq.

Aluminiup akia qanoq ikkaluarpalluunniit Tasersiaq annertuupilorujussuarmik minguitsumik innaallagissamik pilersuisinnaavoq ukiuni tusind-ilinni ataavartumik nukimmik pilersuisinnaasoq. Tamannalu periarfissanik allanik aamma ammaassivoq.

Nunarsuatsinni internet-imik atuinerput annertusiartortillugu, paasissutissat milliard-ilikkaat toqqorsiveqarnissaannut pisariaqartitsineq annertusiartuinnavippoq. Taakkunanilu Datacenterinik taaneqartartuni "lagerersuarnik" nunatsinni pilersitsisoqarsinnaanera eqqartoqqittariaqarparput, periarfissanillu ujartuilluta.



Datacenterit innaallagissamik annertuupilorujussuarmik atuisarput, aningaasarparujussuarnillu kaaviiartitsisuullutik. Assersuutigineqarsinnaavorlu Island-imi datacenterinik pilersitsiortortoqarnerata kingorna Island-ip aningaasaqarneranut iluaqutaalluarlutumik. Tasersiallu annertuupilorujussuarmik nukimmik pilersuisinnaanera, nunattalu nillataartuunera atorluartariaqarparput.

Naggasiutigalugulu paasiniartariaqarpagut Norsk Hydro immaqalu sulii aamma Alcoa soqutiginninersut, kiisalu datacenteriliortitsisoqarsinnaaneranut periarfissat misissorneqarlutik. Taakkulu tamarmik Tasersiami erngup nukerujussuanik pilersitsinikkut periarfissaliisinnaalluni, nunatta aningaarsarsiorneranut annertuumik iluaqutaasinnaasumik.

Tamassi oqallilluarnissassinnik kissaappassi.